

ЛҮИМА СЭРИПОС

7 ноября
2019 года
№21
(1207)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



Ты хурит Югорск ўст ѓлнэ мӑньци нэ Людмила Петровна Волкова
пӑслым ӓлы. Тав Ханты-Мансийск ўсн сӑнквылтап тӑныт ханицта҅кве
ёхталас. Ты урыл 14-15 лӑпсыт ловиньтӑн.

Ты
номерт
ЛОВИНЬТӑН:

Мӑв пӑсэ
и҅ та
щӑпитаве

2

Тав нила
тӑл лӑккарыг
рӑпиты

7

Мӑньци
лӑт҅ув элаль
суйты

8-9

Няврамыт
Солнечный
пӑвылт кассыт


13

Сӑнквылтап
тӑныт
хаництавет

14-15

ЛЯХХАЛЫТ

Мāв пōсэ иң та щёпитаве



Юрий Росич потыртгы

Олнэ мāв, округув, пōсэ (рущ щирыл – герб) иң та пёрияве. Геральдический советт рўпитан хōтпат сўкыр этпос 27 хōталэныл ос мāнь таквс этпос 11 хōталэ мус округ янытыл пōс урыл китыглахтым яласасыт. Тāн сossa мāхум, учёный хōтпат, мирың мāt рўпитан кārкам мāхум, историкыт, Почётный житель нам ошнэ хōтпат ёт потыртасыт, сāvсыр лекцият ловиньтасыт. Тувыл китыглахтасыт, манхурип пōс тāнанылн мāk ёрнув.

Округ мирколт рўпитан мāхум йильпи пōс урыл 2017 тāлт потыртаңкве патсыт. Тōнт тāн лāvсыт, ань ошнэ пōсув пōхан виңкве ат ёри, йильпи пōс тав хурипнувёт вос вāраве. Тувыл округ мāхум китыглаңкве патвёсыт. Мансавит хōтпа, та сāvит номт хулиглас. Кāсың хōтпа маныр номсы, лāтың лāvыс. Пōс щёпитан хōтпат (авторская группа) кāсың потыр нэпакын хассаныл, ань

элаль рўпитэгыт, Югра мāв пōсэ щёпитыяныл.

Ты тэла палт «Геральдика.ру» нампа ишхйпың ут лōпсэ редакторыг олнэ хум, кандидат географических наук Юрий Росич тав пуңкоты. Ювле хулытум этпост тав Москва ўсыл Ханты-Мансийскын ёхталас. Акв хотты хōтал Ас-угорский институтн шалтсас, олнэ мāв пōсэ урыл сossa мāхум ёт потрамас. Тав лāvыс,

Уральский Федеральный округ янытыл туп Югра мā тамле ёрнэ пōс ат оныщи. Ань ты ошнэ пōсув гербыг ловиньтаңкве ат рōви, лāви, тав нас эмблема хольт сусхаты. Таимāгыс Россия Геральдический советт рўпитан хōтпатн пōханлаквтвес. Конституция сākкон щирыл, Ханты-Мансийский автономный округ – Югра Россият янас мāг олы. Тав тамле щёлың мā – мā-вōй ос сāvсыр тының ахвтасыт оныщи, мā-витэ сака нётнэ. Тыт тākсар мāхум олэгыт, Россиявн яныг пāрыс тотэгыт. Пуссын ты вāрмалит Югра пōсэ щирыл вос нāңки.

Ас-угорский институтт рўпитан сossa мāхманув номтаныл ат патыс, ювле лāтың лāvсыт. Тувыл хум китыгласаныл, ос манрыг ат рōви ты пōсув хулытуптаңкве, матаре лōль хунь. **Юрий Росич** лāvыс:

– Пōсыт щёпитан тэла такви правлиат оныщи. Та щирыл тāра нāңки, маныр пōслуңкве рōви, ос маныр ат рōви. Кāсың мā пōсэ – ты пуңкотнэ вāрмалэ тав мāk ёре. Таимāгыс тув матыр пōх ут пōслуңкве ат рōви. Мā щар мāk ёрнэ хуриянэ манос пōсанэ тув атхунь рōви вāруңкве. Номсахтэн, лāvён, маныр тув пō-

слуңкве ёри. Ос ань ошнэ пōсын тай вос олы, хōт-āти вос оныщаве, вос пōс-лаве. Тав туп гербыг лāv-вуңкве ат патаве.

Нāн тыт ань номтанын ат патэгыт, ты лōль хунь. Вāглум, нāн олнэ мāн мāгыс, пōсын мāгыс сыманын щаргёгыт. Воссыг хоталь вāрхатэв, таве пентуңкве ёри, йильпи пōс щёпитаңкве ёри. Югра мāн Россия Геральдический советэ палт мўсхал щирыл вос хансаве, тув пōсың-лўтың тāгыл вос тўлаве.

Пōс щёпитан мāхум пнила янас пōс пōслысыт. Халанылт āти сака аквхурипат – ольпаныл сāvсырыт, пуңкын пиннэ корона пōслувес, тāн халанылт ос сāvсырыт. Ань ошнэ пōсувныл туп хансанув ос кит пуңкуп товлың ўй хулытуптавёсыт. Ты товлың ўй мāн, мāныщи ос ханты, пёс йис потранувт лāvылтаве. Щар мāk таи – кит пупāпщиквев тув пōслувесыг. Пōс щёпитан мāхум лāvсыт, сossa мир пупāпщикве янытлыяныл, таимāгыс тув пōслувес.

Хоты пōс пёрияве, ётыл ущ тāра-паты. Ты овылтыт мāн тах ос газетат хансэв.

Светлана МАТВЕЕВА



Ас-угорский институтт рўпитан мāхум

ЛЯХХАЛЫТ

Нәиңхәпың ләккарыт пәвлың мир пусмалтасыт

Ты туи сыс «Николай Пирогов» нампа нәиңхәп элын өлнэ пәвлытын ялыс, ләккарыт пәвлың мир пусмалтасыт. Ань тән рүпитан мәныл пөйтсыт, пуссын үщлахтуңкве патхата-сыт.

Пусмалтан вәрмалляныл хумус олыс, мансәвит элумхәлас уральтасыт, ань профессиональный патология пүльницат яныг ләккар Николай Ташланов ос ты нәиңхәпт яныг ләккар хум Владимир Слабко ты урыл потыртасыг.

«Николай Пирогов» нәиңхәп ват нупыл ат тәл сыс мир пусмалтым яласы. Тыгыл хөт тәл сәвит округувт, элын өлнэ мәхум уральтым рүпиты. Ты тәл тән лүпта этпос овыл хөталэныл мәнь таквс этпос хусыт хөталэ мус рүпитасыт.

Нәиңхәпыл Кондинский, Белоярский, Хальбус, Октябрьский, Сургутский ос Ханты-Мансийский районытын ялысyt. Пуссын аквәёт атпан нупыл ат пәвлытын хөигласыт. Тот хөт сөтыра арыпкем элумхәлас уральтасаныл.

Ты нәиңхәп кивырт мәхум пусмалтан мәгыс онтоловхуйплов колнак щәпитым олы. Тот операция вәрнэ мәгыс акв мәнь колнак тәстувес. Тувыл флюорография, маммография ос рентген вәрнэ мәгыс йильпи ищхипың утыт эт-тотыгләгыт.

Пәвлытн терапевт, хирург, невролог, ультразвуковой диагностика вәрнэ ләккар, эндоскопист, сам ләккар, үлщ пуңк пусмалтан хөтпа, рентген вәрнэ хөтпа, нә хөтпат пусмалтан ләккар, сым ләккар ос тән

етаныл мәнь ләккарыт эхталәгыт.

Ләккарыт мәхум нас уральтыяныл, матыр агм хөнтәгыт ке, элумхәлас тәра хотты яныг пүльницан кәтыяныл. Хотпа агме хунь сартыннув осн-паттаве, ләккарытн таве пусмалтаңкве күпнитнув паты. Ты тәла урыл тән мирн акваг потыртәгыт.

Ань ләккарыт кәасың тәлныл иң сәвнув пәвылн ят хосыт ялантаңкве патсыт. Күщайг ләвсыт, мөтынтыг пәвлың мәтт рүпитан хөталыт мощ сәвнувег вәравет тах. Ос кәсың тәл тән ят витаныл уральтыяныл. Хөт я витэ молях мәниг емты, тувыл рүпитаңкве овылтахтәгыт, мил торыг тув ялуңкве вос алымәгыт.

Ос төва порат сартыннув ювле минәгыт, хунь я витэ сака молях тәсуңкве паты. Пәвлың мир сәвыңпәлэ сөрыг, сам ос мөт сәвсыр агмыт щирыл уральтахтәгыт. Сәв хөтпа пуңканыл пусмалтаңкве эхталәгыт. Кәсың хөтпа емщакв уральтаве, хүлтнэ ләтныл ләваве. Руц ләтың ат вәнэ мәхум рүтанылн тув тотыглавет.

Ань ты тәл мәхум уральтан мәгыс йильпи ищхипың ут өвтвес. Туи порат овыл щес тамле утыл пувласпи агм өмтнэ щирыл мәхум уральтавәсыт. Ты утыл ватахкем күм сыс тәрвит агм үщ овылтахтын



Н. Ташланов ос В. Слабко

порат тәра-хөнтуңкве рөви. Тувыл хөтпа янытәт уральтахтуңкве пүльницан кәтаве. Матыр пувласпи агм сөль ке олы, тав тәра пусмалтаңкве овылтаве. Ты щирыл тәрвит агм янытәт пусмалтаңкве рөви.

Элын өлнэ пәвлың хөтпа уральтан порат матыр тәрвитың агме хөнтаве ке, тав емщакв ты урыл потыртаве. Тав ты агмөтыл юн ул вос үнлыс. Тувыл пәвыл ләккар ос ләваве, ты хөтпа пусмалтахтуңкве тәра вос кәтаве.

Ләккарыт сәвыңпәлэ уральтан мәхманыл емщакв вәганыл, акваг вәщинтахтәгыт. Ос мәхум таимәгыс вәтихал уральтавет, матыр агм олы ке, тав тәра осн-паттаве ос пусмалтаңкве рөви. Агмың хөтпат ос акваг уральтым оныщавет. Ләккарыт сүнсәгыт, тәл сыс тав хоталь ялыс, хөт пусмалтахтыс, ос ань хумус олы.

Пәвыл миркол күщайт ос пүльницатыт рүпитан ләккарыт акваг нәтмил вәрәгыт. Мәхум пусмалтан мәгыс манхурип ләккарыт пәвлытыт эрәгыт, тән тәра ләвәгыт. Эхтум

ләккарыт мәгыс тән пүльницанылт рүпитан колнакыт ос үщлахтын колнакыт тәстәгыт. Үст, пәвыл ос йис мәт өлнэ мир аквтем сәвсыр агмыл өмталәгыт.

Ты нәиңхәп Ханты-Мансийск үст ань пәг-хартвес. Мөтыт тәл кастыл өмщакв хотщәпитаве. Төва колнакыт мощ мөт щирыл вәравет ос йильпи ищхипың утыт тув натавет. Ты нәиңхәп хөт манос нәолов этпос щәпитаңкве паттаве. Тот рүпитан ләккарыт ань пуссын мөтыт тув мус үщлахтәгыт. Күщайг ләвмен щирыл, эрың, элал хуньт ос акв тамле нәиңхәп вәравет тах. Сәвнув ләккар пәвлытын ялуңкве паты, сәвнув элумхәлас уральтаве.

Ань тәлы ләңхыт вәрнэ юи-пәлт ләккарың кит бригада машинал пәвлытын минәгыт. Тән түяг мус рүпитаңкве патәгыт, нилахуйплов пәвлытын ялуңкве ләвхатсыт. Тәлы порат тәра-паты, эрың, тыгыл иң сәвнув ман минуңкве эрмыгыл. Пуссын эрнэ ләккарыт өләгыт. Ты хосыт нәматыр тәрвит вәрмаль атим.

Николай МЕРОВ

Вөр үргалам хум номаве

Ты этпос 25 хөталэт Ханты-Мансийск үст конференция олыс, руц латңыл тох лававе – Межрегиональная научно-практическая конференция имени А.А. Дунина-Горкавича. Ты тал атхуйпловит щёс махум тот акван-атхатыгласыт.

Александр Александрович Дунин-Горкавич пёс порат олыс. 1854 талт самын патыс, 1927 талт атимыг ёмтыс. Тав вөр үргалан хөтпаг Самаровский лесничество рүпитас, ань тьи Ханты-Мансийск үс. Хум өлмёт сав рүпитас, Татгя, Касум, Вах ос Иртышят ляпат өлум махум наманыл пуссын нэпакн хассанэ. Тот яныгман вөр ханищтастэ, мав карта-нэпакн пёслыстэ. Варум рүпататэ магыс тав сав яныг намыл майлувес, магылн тагата савсыр пёсыл мүйлупталвес.

Тав ханты махум палт акваг ялыс, тән хумус пёс порат олсыт, хумус масхатасыт, коланыл, агманыл урыл тав ты пуссын нэпакн хансыс. Пёс пормасыт атыс. Ань товат Тобольск үс музей-колт оныщавет. Ты хум

сака яныг рүпата вāрыс. Тав наме элаль тотнэ магыс 2005 тал пāсыл мән округувт ты конференция вāрыглаңкв патвес. Тув учёный хөтпат, вөр үргалан махум ос савсыр университетыт ханищтахтын агит-пыгыт ёхталэгыт. Тән номтың потрыт хүнтлэгыт, суссылтапыл вāравет.

Анэ акван-атхатыг-аламаныл порат тананылн Егор Збродов сав ёмас латың лавыс, ты хум недропользование департаментыт күщай ваңын хөтпаг рүпиты. Тав потыртас, мән округувт вөр хумус үргалаве, манах олн тув таставе. Тав лавыс, мән вōранув тыт ёмашакв үргалавет, мән ййвыт акваг үнттавет.

Ма-вōй нōх-винэ хөтпат ма хөт нōх-өхтыртыяныл, тананылн аквты яныт ма мән ййвытыл

үнттуңкв эри. Элаль тав лавыс, ййвыт савсыр суруйитн ул вос пуравет, тән лōлиг ул вос ёмтэгыт, ул вос саёгыт, төва порат ты ййвыт тэрпиң витыл расалтавет. Ты рүпата вāрнэ магыс округ мирколныл ос сав олн миве.

Тав юи-пālэт экономический наука доктор нам өщнэ хум Вадим Исламутдинов потыртас, тав лавыс, ты конференция олнэ порат акваг савсыр докладыт ловиньтавет. Ос тувыл та, элаль нэматыр рүпата ат вāраве. Ань мощ мотширыл элаль рүпитаңкв эри. Университетт ханищтахтын няврамыт савсыр йильпи проектэла вөр үргалан магыс вос хансэгыт, тох элаль вос ханищтахтэгыт ос рүпитэгыт. Тананылн олн ойтуңкв ат эри, тән танти касашим тох рүпитаңкв патэгыт.

Анэ акв ёмас вāрмаль касың тал вāрыглаве. Ты конференция элы-пālт студентыт халт касыл вāраве, хотыютаныл мак ёмас ос пумыщ потыр хансы. Тән халаныл

акв хөтпа пёрияве ос яныглаве.

Ты тал Нижневартовский ос Югорский университетыт ханищтахтын агит-пыгыт халт нила хөтпа танти хансум потраныл ты касылн тетсаныл. Ты потрыт пуссын ловиньтавёсыт ос Югорский университетт ханищтахтын аги Кристина Русских нōх-патум хөтпаг лаввес. Тав анэ А.А. Дунин-Горкавич намыл пиным премиял ос лов сōтыра солкōвил майвес.

Та юи-пālт конференцият өлум махум танти потраныл ловиньтаңкв патсаныл. Савыңпалэ пуссын вөр үргалан рүпата урыл потыртасыт. Хөталгыят юи-пālт лāкква-уртвёсыт. Нила колнакт савсыр секцият олсыт.

«Краеведение» урыл секцият щар сав хөтпа олыс. Касыңе сака пумыщ потыртас. Марий Эл маныл ёхтум аги Ольга Кочакова татем сымыңыщ ханты махум урыл потыртас. Пёс порат тән хумус олсыт, хумус тән



К. Русских



Вөр үргалан хум



Нэпак ловиньтэг

КҮЩАИТ РҮПАТАНЫЛ



Василий Купкин потыртты

масхатыгласыт.

Тав тох лавыс: «Ам маньши ос ханты махум урыл шар нэматыр торыңыщ ат вәслум. Мән, мари́й махум, тән холь-

таныл Най-Отыр оныщев, Төрүмн пойкшан магыс вөрн ялэв, пуңк пинэв. Александр Дунин-Горкавич пёс порат хансум нэпаке ёмашакв ловинь-

таслум, татем пүмшиг ёмтыс, соль, шар ляга рүгыг ханты махум ёт олэв.»

Аги юи-палт Василий Купкин потыртас, тав каснэ вәрмалит щирыл рүпиты, рүпитан кола-ныл тох лававе – «Федерация спортивного туризма». Тән округв янытыл ўшлахтын мāt щёпитэгыт, махум савсыр мән тотыглыяныл. Тав лавыс, тән касың тал Нёранув нупыл ялантэгыт, тот хумус ўшлахтэгыт, нёрн нох хумус хәңхэгыт, ты урыл потыртас, сав хури суссылтас.

Сосса мир урыл потыртан магыс махум ос янас атхатыгласыт. Тот ос Т.А. Молданова пуңкто-

тыс. Тән ос савсыр пёс пормасыт ос пёс накыт урыл потыртасыт. Апат пёс порат хумус юнтивёсыт, юнтуп туштын төрыт урыл, музеит урыл.

Та юи-палт ты конференцият олум махум оста акван-атвёсыт. Хүнтлум потрыт урыл потыртасыт. Хотьют сака ёмас ос пүмыш потыр ловиньтас, тав янытлавес. Пуссын пүмашипа лātңыл лаввёсыт ос янытлан нэпакыл майвёсыт. Ань ты потрыт пуссын акван-атавет ос ловиньтан нэпакыг тах варавет.

**Валентина
ХОЗУМОВА**

Акван-нётхатым м̄-витув ўргалаңкве эри

Савсыр ханищтахтын колытыт
См̄-вит ўргалан вәрмалит хумус элаль тотавет, хумус м̄-витув макыг ўргалаве, ань ты тэлат урыл округ мирколт савсыр күщайт потыртасыт. Та комиссият рүпитан хөтпат «Учимся жить устойчиво в глобальном мире. Экология. Здоровье. Безопасность» ос «Школьное лесничество» нампа проектыг урыл потрыт хүнтлысыт.

Овлёт ханищтап департаментыт рүпитан кушай нэ Ирина Лашина лавыс, м̄-вит ўргалан ос таве сыстамыг ошнэ магыс хансум проектэ ёт тән М.В. Ломоносов нампа МГУ олнэ ЮНЕСКО кол палыл акван-нётхатым рүпитэгыт. Тувыл таве элаль тотнэ магыс савсыр регионит халт «сетевое партнёрство» намаим вәрмалы щёпитасыт. Ань школат ханищтан сав хөтпат, ныврамыт, тән щань-ащаныл акван-атвёсыт ос пуссын акван-нётхатым м̄-вит ўргалаңкве лаввёсыт. Округв янытыл 16 мāt ты проект ёт рүпитаңкве

тара патсыт. Ты савсыр ханищтахтын колыт, тән Нефтеюганск, Пыть-Ях, Сургут, Урай ўсытыт ос Сургутский районт олэгыт. Ётылнув иң ат мāt аквтох рүпитаңкве кәсащасыт, ань тән эрнэ нэпаканыл ос заявканыл департаментын вуйвёсыт. Мотаныт ушты нэпаканыл щёпитыяныл ос тал оигпан элы-палт тах пирмайтавет.

Та щирыл ке, округв янытыл янге-мане пуссын м̄-витув ўргалым оныщияныл. Танки элаль пуштагыл олнэныл магыс ты тэла элаль тотыяныл, ят, тұрыт сыстамыг вос олсыт, сыстам лылыёпыл



Александр Гомзяк потыртты

лылтуңкве вос вёрмысыт.

Мот вәрнэ проектаныл «зелёный» детский сад ос «зелёная» школа намтым оныщияныл. Ань ты тэлат Лангепас ос Сургут ўсыгт олнэ нила школат рүпитаңкве вуйхатсыт. Мот мāt ань ушты ты проект урыл ваңкве патсыт ос тән аквтох матыр вәруңкве патэгыт.

Тувыл аквта департаментыт рүпитан хум Александр Гомзяк «Школьное лесничество» нампа программа урыл потыртас. Ты тэла тән Сургутский государственный университет ёт акван-

нётхатым щёпитасаныл. Тот наука магыс сыресыр вәрмалит ханищтаңкве патавет. Мāv төрумныл пöслым хурит ёмшакв сунсыглыяныл ос порсың, паңкың м̄-лөмтыт сыстамтаңкве вос вөрмавет, тувыл элаль савсыр порс тот ул вос атаве.

Яныг таквс э́тпос о́выл щисланэ́т Сургут ўст ты программан хансым тэлат урыл потыртаңкве махум атхатэгыт тах. Ос маныр тән лавёгыт, хумус школат ныврамыт ханищтаңкве патавет, мән элаль ос нанан хансэв.

Тамара МЕРОВА

Мир пусмалтан махум акван-атхатыгласыт



Яныг таквс этпос овылтахтын порат округт рупитан мань леккарыт Ханты-Мансийск үст конференциян акван-атхатыгласыт. Округ кұчай вañын хум Всеволод Кольцов, округ мир пусмалтан департамент кұчай Алексей Добровольский, округ пұльница яныг леккар нә Елена Кутефа ос мотаныт пуссын тув ёхталасыт.

Савсыр пұльницатт сав мань леккарыт рупитэгыт, тән магсыланыл ханищтахтын вәрмаль щёпиталвес. Хумус агмың-мосың хотпатын ос мот савсыр тәрвит агм ошнә махумн эрнә щирыл нётмил вәруңкве, тән тот ханищтавёсыт. Ты вәрмалын савсыр маньл китсат арыгтем элумхолас ёхталас.

Всеволод Кольцов лавыс: «Округувт ват нупыл хот сотыра мань леккар рупиты. Мать-ёмас нан ань ұсытныл, павлытныл тыг ёхтуңкве вөрмысын. Тыт нан пусмалтан вәрмалын ханищтахтэгың, халанынт вайхатуңкве патэгың. Нан яныг леккарытн акваг нётэгың, агмың хотпат пусмалтэгың, тананыл акваг уральтым оныцияныл. Нан талын сака тәрвитың олнув, ам яныг пұмашипа нанан лавёгум. Ты ханищтахтын вәрма-

лин ёмас тэлаг ос яныг онтасыг вос ёмты».

Округ мир пусмалтан департамент кұчай Алексей Добровольский лавме щирыл, ань округ пұльницанувт савсыр тәрвитың агмыт пусмалтаңкве рөви. Югра мат төва павланув сака элын олэгыт, ань тув леккарыт туи ос тэлы порат ос ёхтуңкве вөрмёгыт. Мань леккарыт тыт танки пұльницаныл ос рупитаныл урыл сакати потыртэгыт, халанылт мир пусмалтан тэлан ханищтахтэгыт. Ань махум пуссын акваг-нётхатым рупитэгыт.

Елена Кутефа лавме щирыл, округ пұльницат яныгсат арыгтем леккар мир пусмалтэгыт. Тананылн нётым хұрум-саткем мань леккар рупитэгыт. Тән этә-хоталә агмың элумхолас ляпат олэгыт.

Маньлат леккарыт

овыл щёс рупитаңкве ёхтынэныл порат, яныг нётмил тананылн мак мань леккарыт ты вәрёгыт. Тән хосытаныл леккар элалы мухсал щирыл рупатаңкве паты, сав вәрмалын тавётыл ханищтахты.

Маньлеккарытоперация вәрнә порат тән ты шар яныг нётмил вәрёгыт, агмың хотпат тәрпил мыганыл ос акваг уральтым оныцияныл. Ань тыммагыс тамле ханищтап ты щёпитавес. Тыт тән хаснә рупитаныл халанылт вос сусылтыяныл, ванә номтаныл уш рупитаңкве ёхтум агитн-пыгытн потыртыяныл.

Тувыл Ханты-Мансийск үс Медицинский Академият няврамыт ханищтым рупитан нә Тамара Овечкина потыртас. Тав лавыс, 1920 талытт округувт туп кит пұльница олыс. Тонт сака сав сосса махум агманыл паттат хотталы шалтсыт. Леккар ат төвылхатас, тәрпи ос мощца олыс.

Сургут үст ос Хальүст кит яныг пұльницаг рупитасыг, яныгнув павлытт ос сат мань пұльница олыс, тувыл та. Мань

павлытын мөрсың порат фельдшерыт ёхталасыт. Савыңпалә махум уральтаттал олсыт. Сосса махум няйт хотпат палт пусмалтахтуңкве ялсыт.

Ётылнув уш 1934 талт Остяко-Вогульск үст фельдшерско-акушерский ханищтахтын кол пұсвес. Тонт овыл щёс тот ханты, маньши, саран, ёрн, селькуп махум мир пусмалтан вәрмалын ханищтаңкве патвёсыт. Ты вәрмаль щирыл 1938 талт ханищтахтын маньл аслам нилахуйплов сосса леккарыт павлытн рупитаңкве кётвёсыт. Война ёмтум мус тот яныгсат нелоловхуйплов элумхолас ханищтахтын маньл асламыт. Сав хотпа хонтлын мань тотвёсыт, савыңпалә юв ат ёхтысыт.

Ты ханищтап кол онтырсат нупыл ат тал рупитанэтә сыс нелолов арыгтем сотыра савит маньлеккар тувыл тартвес. Ань тот сав маньлат агипыг ханищтахты. Тән асламэныл юипалт округ павлытн, ұсытн мир пусмалтаңкве ләкква та мингалэгыт.

Николай МЕРОВ

ПУСМАЛТАН ВАРМАЛЬ

Тав нила тал лёккарыг рүпиты

Маньлат маньщи хум Иван Хозумов Хальүс район Кимкъясүй павылт лёккарыг рүпиты. Тав 2015 талт ханищтахтуңкве асталас ос тара рүпитаңкве тув минас.

Ам тав урётыл маньщи газетат хансыгласум, тонт Иван Кимкъясүйн лёккарыг рүпитаңкве ущ ты ёхтыс. Павлың мир пуссын хот-щягтсыт ос акваг лавыгласыт, маньлат пыг мань павылквет олункве вос ханыщувлы, мот мань рүпитаңкве ул вос мины.

Нила арыгкем тал ювле ты хульгыс, туи Кимкъясүй павылын ялум порат пүльнищан шалтсасум. Маньлат хум акваг щирыл лёккарыг рүпиты, павлың мир пусмалтыянэ. Махмыт таве сака янытлыяныл, эруптыяныл ос Иван Васильевичиг лавияныл. Лёккар хум рүпататэ урыл ос китыгласум, тав тох потыртас:

– Тыт олункве ос рүпитаңкве ам тара ханыщувласум, тыммагсыл нила тал моляк ювле хульгыс. Ам ёхтумум порат тыт ёмас, йильпи пүльница унттувес. Аквпал ёрёт пүльница рүпиты, мотпал ёрёт ам олнэ колум олы. Пүльнищав ос олнэ колум кұрыл палтыглыягум, сартым ұльювыл тотавем ос палтыглахтын сэмьл ахвтасыл ёвтавем.

Ты элы-палт тэрпи тыналан кол ат рүпитас. Ам лицензия ос мот эрнэ нэпакыт варсанум, ань пүльнищат тэрпи тыналэгум. Тэлы порат амки машинал Хальүсн ялантэгум, туи порат Кульпасныл хәпыл тыт тотыянум.

Кимкъясүйт ань яныгсәткем хотпат олэгыт. Тэлы порат пүльнищан 60 арыгкем элумхөлас пусмалтахтуңкве ёхталэгыт. Туи мирув савнүвег ёмты, 30 арыгкем няврамыт ханищтахтын маньл юв ущлахтуңкве ёхталэгыт.

Павлувт сав яныгпала хотпат олэгыт, тананыл уральтаңкве касың хотал коланылн ялантэгум, уколлыл тўщтыянум, тэрпил хансыянум.

Павлың мир гриппагмыл ул вос агмалтахтасыт, таквсы порат прививка-тэрпил пуссын вариянум. Юи-овыл талт тыт сав няврам самын патсыт. Ань садикн 15 арыгкем агирищит, пыгрищит ялантэгыт. Мань няврамыт ос эрнэ прививкал вәтихал тўщты-



И. В. Хозумов ос Е. Н. Таратова

янум. Ты тал акв няврам самын патыс ос акв нэ ань тәрвитыңыщ олы».

Кимкъясүй павылт олнэ махум связь тал олэгыт. Ам маньщи хум китыгласум, элумхөлас хунь илтторыг агмыл ёмты, хумус Хальүсн свониты. Маньщи хум ювле лавыс: «Павлувт таксофон рүпиты, тыг лёккарыт вовуңкве вёрмөв. Ань ос пүльнищат интернетыл вәрвөсум, ты ищхипың ут хосыт Хальүсн ос свонитэгум».

Иван Васильевич мань павылын контракт-нэпак хосыт рүпитаңкве ёхтыс. Нэпак щирыл ос акв тал тот рүпитаңкве тах паты. Ам ос пумщалахтасум, элаль маньр вәруңкве номсы, мот мань вантлы манос Кимкъясүйт рү-

питаңкве хульгы. Маньлат хум ювле лавыс: «Элаль маньр вәруңкве патэгум, хоталь минэгум, ань ат ваглум. Лёккарыт ат тал сыс акв щёс ханищтахтуңкве кётыглавет. Мотыт тал ханищтахтуңкве тах минэгум. Тох тай Кульпас павылын ос Хальүс пүльнищан рүпитаңкве вовавем. Ты урыл иң ат номсахтасум, тыт ос акв тал рүпитаңкве тах эри».

Ань Иван Васильевич това порат Кульпасн рүпитаңкве кётыглавет. Туи порат маньщи хум та павылт лёккар-хотпа пентсыл акв этпос рүпитас, тот олнэ мир пусмалтасанэ.

Людмила ТЕТКИНА



Кимкъясүй павылт олнэ мир



Пүльница кол

СОССА МИР ӨЛУПСА

Мāньщи лāтңув элаль суйты

Мāн редакциявн ты потыр акв руц учёный хум Василий Харитонов тотыстэ. Тав ос мāнылат āги Дарья Жорник Москваныл лўсум мāньщи-янув палт рўпитаңкве ялсыг, лāвэг, нйврамыт эт мультикыт вāрысyt, пōслысыт ос халанылт акваг мāньщи лāтңыл потыртасыт.

Тāн ищхйпың мāt «ВКонтакте» «Мāньщи вāрмалюв» лōпс вāрысyt, пуссын вāрум утаныл ос хурит тот сунсуңкве вёрмегын. Даша Жорник эт потыр нйврамыт (Таня Анямова, Толя Анямов, Вова Бахтияров, Галя Дунаева, Даша Дунаева, Сантыр Анямов) тāнти хассаныл, таве элаль ловиньтэн.

– Паща олэн. Мāн мāньщи мāхум, ханищтахтэв Полуночный пāвылта, олэв Ушма пāвылта. Мāн палтув эхтыс сака ёмас ос пўмаш элмхōлас. Паща!

– Паща олэн.

– Наң намын маныр?

– Ам намум Дарья, опарищ намум Жорник.

– Хōт наң ханищтахтэгың ос рўпитэгың?

– Ханищтахтэгум ос рўпитэгум Москва ўст. Ханищтахтэгум университетта, Московский Государственный университет наме, рўпитэгум ос акв института Москват,



Нйврамыт Дарья эт потыртэгыт

Институт Языкознания наме. Ам Москва ўст самын патсум, ань ос тот олэгум.

– Наң хумус тыг хōнтхатсын?

– Ивдельн ам Москваныл поездыл эхтысум, тувыл Ивдельный Полуночный пāвылн мāшинал эхтысум, ань тыт олэгум.

– Наңын ёмас Полуночный пāвылта ос Ушма пāвылта?

– Сака ёмас. Полуночный пāвылта āнумн сака пўмаш мāньщи мāхум эт рўпитаңкве ос потыртаңкве ос сāvсыр утыт аквэет вāруңкве. Ушма пāвылт āнумн ос ёмас, ам тот ос мāньщит эт потыртэгум, вōрта ёмыгтэгум, тыя пуссын āнумн сака ёмас.

– Наң хосат тāгыл мāньщи лāтың вāгың?

– Ам мāньщи лāтың хўрум тāl ханищтахтэгум.

– Манрый наң мāньщи лāтың ханищтаслын?

– Ам мāньщи лāтың урыл тамле нэпак оныщегум, ам ты нэпак ловиньтаңкве патсум, āнумн сака пўмаш ёмтыс, ам номсасум, мāньщи щирыл потыртаңкве таңхегум, тувыл мāньщит эт румалахтуңкве, элаль ханищтахтуңкве. Мāньщи лāтың сака хорамың лāтың, хунь матыр мāньщи лāтың ловиньтэгум ман потыртэгум, āнумн акваг сака пўмаш.

– Наңын манрый мāньщит ёмасыт?

– āнумн пўмаш мāньщит эт потыртаңкве. Мāньщи мāхум сака сāv вāганыл вōр урыл, мā-вит урыл, хумус тот олэгыт. Москва ўст мāхум тамле утыт ат вāганыл.

– Наң мāньщи лāтың ханищтылын, элаль маныр кусэгын вāруңкве?

кве?

– Ам кусэгум сāvсыр мāньщи пāвылн эхтуңкве, хōт мāньщит олэгыт, тувыл мāньщи щирыл потыртаңкве ос вāңкве, хумус сāvсыр мāt мāньщит потыртэгыт. Ушма пāвылт сāv мāньщит олэгыт, āнумн тāн етапыл ёмас потыртаңкве, но тахнувум ос мōт пāвылтна эхтуңкве, Лэпла пāвылн, Түрвātна, эрың мōт пāвылн ос, тот потыртаңкве ос элаль ханищтахтуңкве.

– Наң ос матыр потыр потыртэн.

– Матыр потыр? Ам сўкыр этпост конференцият Венгрият олсум, тот мадьяр мāхум олэгыт, āнумн тот сака пўмаш олыс. Конференцият мāньщи лāтың урыл потыртасыт, мадьяр лāтың урыл, сāv элмхōлас тот олсыт. Ам ос тот мāньщи лāтың урыл потыртасум сāvсыр мāхум эт, ты ёмас вāрмалы олыс. Венгрия - ты хорамың мā, ам Сегед ўст олсум, тот хорамың колыт, акв я тот олы, ам ты ўс котилыт ёмыгтасум ос мадьяр мāхум эт потыртасум. Тыя ам потрум.


– Пўмашца! Ос ёмас ўлум!

– Ос ёмас ўлум!

Василий Харитонов тотум потыр



Дарья пыгрищ эт потырты



Дарья Жорник

Тәръя урыл потыр



А. В. Анямова, Валера пыге ос Даша



Степан Анямов Даша ёт потырты



А. А. Анямова Дашан потырты



М. В. Тасманова потре Дашан хансаве

Ам ос Дарья Жорник урыл мощ хансуңкве таңхөгум. Манылат аги Москва ўст языкознание институтт рўпитеы, тот савсыр мирыт латңаныл ханищтавет. Даша рўпатаэ ос маныщи латың ханищтан урыл титыгласлум, тав тох потыртас:

- Ам маныщи латың хўрум тал ханищтөгум. Овлёт ам институтумта маныщи латың урыл нэпак хонтсум, ты нэпак ловиньтаңкве патсум, анузн сака пўмщицг емтыс. Ам маныщи латың ос маныщи махум урыл потрыт кинсуңкве патсум, рўпата махманум китыгласанум, хот маныщицт олэгыт ос хумус тан палтаньл ёхтуңкве рови.

Москват нэмхотьют тыя ат вастэ. Тувыл ам интернетта Ханты-Мансийскит Ас-угорский институт хонтсум ос тув пищма кетсум, тот китыглахтасум, хот ань маныщи латың потыртан махум хонтуңкве рови.

Ам лаввесум, Ивдельский районт маныщи павлыт олэгыт ос ты Ас-угорский институтта акв аги рўпитеы, тав Ивдельский районт самын патыс ос яныгмас. Ты аги наме Татьяна Бахтиярова. Мён тав ётэ хасхатсумён, румалахтсумён, тав анузн маныщит урыл сав потыртас, тувыл тав лавыс, ам Ханты-Мансийскинке ёхтөгум, касалахтуңкве ос потыртаңкве, аквьёт рўпитаңкве рови.

Ам хот-щайтсум ос Ханты-Мансийскинке ёхтысум, ты 2017 тал олывс, тал котиль ман юсвой этпос. Ханты-Мансийскит ам Таня ёт сав потыртасум, тавпотранэ ёл-хассум, тав лавыс, ам таңхөгум ке, Ушма павылн туи ёхтуңкве рови, тав рўтанэ ёт румалахтуңкв. Туи мән

Таня ёт ос акв рўпата юртаги Покровская Софьям ёт Ушма павылн ёхтысўв, тот мён маныщи махум палт хўрум сат сыс олсумён.

Та юи-палт мён юртагим ос кўщажом ёт маныщи латың урыл проект воруңкв номыл-матасўв, мән сака хоса ты урыл номсысум ос фундаментальный исследования Россия фондын мән проектув урыл заявка-нэпак хассум. Заявка ёмас олывс ос мән проектув магыс мощ олн висўв, ты олн мән экспедицият ос конференция магыс холтсанув.

Ам ань касың тал Ушма павылн ёхталэгум (аквщёс тэлы порат тот ос олсум, ань ос тэлы порат тув ёхтуңкве кусөгум), тот ханищтахтөгум, хумус тот маныщи щирыл потыртэгыт, манхурип савсыр латңыт олэгыт, мот павлытыт махум халанылт хумус потыртэгыт. Маныщи потрыт ёл-хансуңкве ос касың латың ханищтаңкве анузн аква сака пўмащ.

Таквсы порат мён Василий Харитонов, рўпата юртехум ёт, Полуночный павылн интернатна ёхтысумён маныщи няврамыт ёт румалахтуңкве ос рўпитаңкве. Тот сака пўмащ олывс, мән няврамыт ёт сав потыртасўв, мультик маныщи щирыл вурсув, комиксыт (ты маны хурит) пслысўв.

Ятил агикве маныщи мирув ос латңув татем та эруптытэ, Най-Отыранувн вос ўргалаве, элаль ос сав рўпата ты хосыт вос вэри.

Галина КОНДИНА

Акв стих 16 рӯт мир латңытн толмащлавес

Катпаттамн ам аңкватэгум –
Тұрыт, ят ам кәсалэгум,
Олнэ колум тот сусхаты,
Хотал нёр тапәлн түйтхаты.

Сәлы лёңх хосыт сүсэгум,
Сәлы сун ам тот хонтэгум,
Морах пилкве татем сәв,
Вөркве, пёс йис өлнэ мāv.

Катум сым ляпан пинтльлум-
Щаньтем эрыг ам хулылум,
Хәптем йинэ суге өс,
Тувыл суйты посың Ас.

Опам латңе сумылләлы,
Аквтоп аращ посымләлы,
Рәтнэ кәйп суй хунтамласум,
Мә-вит эрге кәсаласум.

Катпаттан наң аңкватәлән...
Сымын кәтын пинумтәлән...

Ты стихотворение Алла Иштимирова-Посохова 2010 тәлт хансыстә. Тав та тәлт Павел Тарасович Костин ащәйкатә номылматәстә ос тамле стих хансыс. Алла ләвыс, тав мәниг өлме порат ащәйкатән кәтпаттатә суссылтастә ос өйка тав щәрхиланэ урыл мөйт холът тавән потыртас. Ань ты потыр стихыг тав элалъ хансыстә ос акв проект щәпитас. Ты руц латңыл хансум стихе 16 финно-угор рӯт мир латңыг толмащлавес ос пұмыщ нәпак таратавес. Нәпак суссылтан мәгыс ос ты рӯпата вәрум хәтпат урыл хунтлуңкве Ханты-

Мансийск үст өлнэ мәхум нәпак ловиньтан акв колн вөвиньтәлвөсыт.

Тәнки щәнә латңаныл вәнә хәтпат стихотворение толмащласаныл ос нәпак кәсың лөпсын хоты хәтпатн хурит кәтыл пөслувөсыт. Ты мәхум наманыл пуссын тот өлэгыт. Тувыл ты нәпак таратан мәгыс руц пөзт Павел Черкашин ос учөный нә Дина Герасимова эрнә потыр өвлөт тув хассыг.

Ханты латңыг ты стих Евдокия Нөмысован толмащлавес ос хури Геннадий Райшев пөслыс, Светлана Динисламова мәньщи латңыг хансыстә, хури Али-Владислав



Алла ащәйкатә хури суссылты


Алеев пөслыс. Мөт латңыл хансум ос пөслум хәтпат наманыл ань нәпак кәтыт пувнән порат тах кәсалыянын ос нәнки ловиньгыянын. Тот кит финно-угор мирыг латңыл потыртан мәхум шар мощца хулытыс. Алла ань ты латңыг ханищтан учөный хум Санкт-Петербург үст хөнтыстә, наме Мехмет Муслимов. Тав водь ос ижор мәхум латңыг ты стих толмащлаңкве кәсашас.

Ань тув атхатыглам мәхум това толмащлым стихыт ищхипың ут хосыт хунтлысаныл. Тувыл та колт рӯпитан нә Га-

лина Светина удмурт латңыл стих ловиньтастә, кит әгиришиг Алина Н. ос Света К. мәньщи латңыл хансум стих ловиньтастән. Евдокия Нөмысова такви толмащлам стихе ханты латңыл ловиньтастә.

Алла «Загляну в свою ладонь» намаим нәпак таратан мәгыс такви өлнөйтыс. Тав сосса мәхум щәнә латңыт ханищтан тәл кастыл ос финно-угор мәхум пуссын акван-юрщхатнә ос тәксарыг элалъ өлнә мәгыс вәрыстә. Тув эхталам мәхум пуссын ты нәпакыл мүйлуптавөсыт.

Тамара МЕРОВА



Вероника Б. руц латңыл стих ловиньтас ос әквөн нөтыс



Алина Н. ос Света К. мәньщи латңыл стих ловиньтасыг

СОССА МИР КУЛЬТУРА

Щащёквам хольт юнсахатэгум



Наталья Леонидовна ос Света агитэ



Н. Л. Яркина

Түяг Хальүс район Ягрим павылт турлөпс вәрнэ нэт халт Наталья Леонидовна Яркина щаквщис. Тувыл нэ Ханты-Мансийск үст апа вәрнэ семинарт вәслум. Тав катыл матыр-ати вәруңкве пуссын хасы – сасныл апат ос хусапсовыт юнты, сакныл савсыр хорамыт харты, сэтапыл ханты щулкиныт саги.

Нэ китыгласлум, хотыл олы, тох мащтырлаңкве хөт ханищтахтас. Нан ань элал Наталья Леонидовна потре ловиньтэлын.

– Ам Тэк павылт самын патсум, тот яныгмасум. Омагум-агтягум ханты хөтпаг. Омам Юлия Кузьмовна, такви бпарищ наме Макарова. Атям Леонид Николаевич Миляхов воряян ос хул алыщлан хөтпаг олыс. Щащёквам олмет сав пормас юнтыглас. Яныгхөтпат таве номыл-маталыяныл, ам лялгум лавегыт: «Наталя, щащёкван олыс те, наң ань нэ-тнэ маснудыт ёмыгта-

нужны. Тав сака мащтыр нэ олыс, матыр-ати вәруңкве пуссын хасыс».

Щащёквам хосат атимыг ёмтыс, тонт атям хөтхуйплов талэ ущ төвлыс. Опам ты элы-палт холас. Атям савалапыг хультыс. Номилум, тав акваг матыр мащтырлас – суныт, хәпыт ос альщлапыт щёпитас, хулпыт хасыс. Ам ань ос улпыл щащёквам хольт юнсахатэгум. Света агим ос катыл сыре-сыр пормасыт вәри.

Ханты-Мансийск үсн Наталья Леонидовна агитэ ёт ёхталас. Тыт тән пёс щирыл ханты

апа юнтсыг. Агирищ ань сатыт классыт ханищтахты. Китыгласлум, ты аман овыл апатэ, тав тох потыртас:

– Тэк павыл школавт катыл савсыр пормас вәрнэ кружок олы. Мән тот Галина Михайловна Курганова ёт щаквщёв. Сасныл юнтнэ тэла ам сака эруптылум - апат юнтэв, хусапсовыт вәрёв, хорамыл щуртыянув. Тувыл ДПИ (декоративно-прикладное искусство) кружокн ялантэгум, тот ос сакныл турлөпс, пальсак ос мөт эрнэ пормасыт хартэв. Юнтуп тущтын пүтскат ос телефон пиннэ хурыгсовыт юнтэв, хорамытыл вәриянув.

Каркам агирищ нас ёнгын магыс ёмасыныт апа юнтыс. Сосса махум пёс щирыл катыл вәрнэ пормасаныл ханищтан учёный нэ Н.Н. Фёдорова Света юнтум апатэ сунсыгластэ. Нэ лавыс, апатэ ёмас щирыл вәрме, пёс махум хольт эрнэ хансатыл шуртме. Агирищ маттем та янытластэ.

Наталья Леонидовна такви тай яныгнув апа юнтыс. Тав лялтэ лавегум, апа вәруңкве нас хунь, улпыл тәрвитың. Нэ тох лавыс:

– Атхунь, ты сака тәрвитың рупата. Ты ам овыл

апам, хусапсовыт тай юнтыгласум. Маньтагыл вәщинтасум, павылт олнэ яныгхөтпанув хумус мащтырласыт, тананылныл ханищтахтасум. Ань ты хөтал мус ос акваг акваг-атхатэгыт, катыл матыр вәрёгыт, щаквщёгыт. Төванакт Галина Михайловна Курганова палт школан щалтапалэгум, сунсэгум, тав няврамытн маныр суссылты.

Школат ханищтахтамум порат «Ас ай ёх» ханты ансамблит эргысум, йиквсум. 2003 талт Ханты-Мансийск үст экономический колледж астласум, ләпкаң нэг патхатыгласум. Етыл, 2014-2017 талытт, юил ялантым педколледжит овыл классыт учителиг ханищтахтасум.

Школат тох иң аты рупитасум. 2010 талт клубн патхатамум пәсыл ань тыхөтал мус тот та рупитэгум. Ханты мирув культура ам сака янытлылум. Мән, клубт рупитан махум, пёс йис вәрмалянув нөх-вөрмалтыянув, элал тотыянув. Таимагыс тамле хөнтхатыглапыт олнэ мән акваг ялантэв, сосса махум ёт щаквщёв, ханищтахтэв.



Наталья Леонидовна омагэ ос агитэ ёт послым олы

Светлана
РОМБАНДЕЕВА

КАСНЭ ВАРМАЛЬ

Маньхапыл касуңкве пуссын вос хасэгыт



Т. С. Сазонова Вера агитэ ёт



О. В. Сидак вёртышал нупыл пёслым олы

Ман округут тал сыс савсыр касылыт вэрыглавет ос махум тув вёвыглавет. Акв тамле касыл туи Хальёс район Ягрим павылт щёпиталвес ос «Маньхап» намаим олыс. Муй хөтпат маньхапыл товункве савсыр павлытныл тув ёхталасыт.

Ты махмыт халт руш нэ Тамара Степановна Сазонова олыс. Тав Октябрьский район Большой Атлым павылныл ёхталас. Касыл урыл тав лавыс: «Ягрим павылн мён Вера агим ёт ёхтысамён. Маньши хапыл овыл щёс товсум. Овлёт мощ пылыщмаң олыс, аква номсысум, витын ты рагатёгум. Агим тай тара ханищтахтас, маньхапыл молях товыс. Тасавит мир тыг вёввёсыт, тән пуссын касуңкве ёма-

шакв хасэгыт. Ам тай нас пүмаш магсыл тыг ёхтысум. Октябрьский район Шеркалы павлувт «Юрмант» нампа касыл касың тал вэрыглаве. Махманув ханты хапыл касуңкве тув вёвыглавет. Мён агиментыл ос тув яланталымён. Ам ханты хапыл товункве мощ хасэгум. Тән хапаныл мөт щирыл вэрим олэгыт».

Тамара Степановна ос лавыс, тав касуңкве сака касащи, тыммагсыл ватихал савсыр мән вё-

выглаве. Ты элы-палт яныг кёр-поталыт (гирят) нөх-алмуңкве Октябрьский павылн ялыс.

Мөт нэ Оксана Васильевна Сидак Белоярский үсныл ёхталас. Касыл урыл таи потыртас: «Амки Ягрим павылныл олэгум, тыт самын патсум, яныгмасум. Омам ты павылт олы. Ань тав палтэ муйлуңкве ёхтысум. Ам маньхапыл товункве сака ат хасэгум. Валентина Иргант, Белоярский үст олнэ нэ, анум тыг вёвыстэ. Төва махманэ ёхтуңкве ат вёрмысыт, тән пентсыланыл маньхапыл касэгум. Анумн ты ялпың хөтал сака мұстыс. Такем атың хул исмитыл тыттувесүв, павлың махманум тыт вацинтасанум, ань тай ёмас номтыл ювле минэгум».

Маньхапыл каснэ махмыт халт шар яныгпала хөтпаг Дмитрий Васильевич Юхлымов олыс. Ханты ойка 76 талэ товлыс.

Тав Хальёс ос Тэк павылныл олнэ махманэ ёт тув ёхталас. Тав ётэ ам овыл щёс Нефтеюганский район «Сказка» нампа үшлахтын мат вайхатасум, тав касың туи касуңкве вёвыглаве.

Ягрим павылт хөнтхатыгламумён порат, яныг ойка лавыс: «Махманув маньхапыл пёс йис тагыл хул алыщласыт ос мөт рупатаныл вэрсаныл. Ань маньлат агиянув, пыганув ты вэрмалил сака ат пүмшалахтэгыт. Хальёс район күшчаянув ты касыл урыл сака ос ат номсахтэгыт, тамле ялпың хөталыт ат вэрыглэгыт. Ос таи лавёгум, касыл ватихал вос вэрыплануве, яныгпала хөтпат тув ос вос вёвыглавет. Яныгхөтпатн нёвсуңкве эри, маньлат махум ёт пүмаш магсыл вос касэгыт ос тыхал товункве вос ханищтыяныл. Туи Нефтеюганский районын ялмум порат, тыи касаласум, Нижневартовский, Сургутский ос Нефтеюганский районитт олнэ сав сосса яныгпала махум маньхапыл яласаңкве ёхталэгыт. Маньлат агияныл, пыганыл ёмашакв ханищтыяныл. Шар мак ёр спортсменит тот ты олэгыт. Хальёс район күшчаянув сосса махманув магыс тамле ялпың хөтал ватихал ос вос вэрыглэгыт».

Людмила ТЕТКИНА



Л. Тихонова ос Д. В. Юхлымов

Няврамыт Солнечный павылт кассыт

Сургутский район Солнечный павылн няврамыт касуңкве аква атхатыглэгыт. Касыл мәнъ таквс этпос 21 хөталныл 26 хөталэ мус минас. Няврамыт тот сәлың сун ұлтта поргысыт, тыньщаң рёпыгтасыт, аква мәныл элалъ поргысыт, ошща ййв-өвыл ёт хәйтсыт ос сәграпсуп эл пәхвтысыт.

Касыл физический культура ос спорт щирыл рупитан департамент, «ЮграМегаСпорт» намба кол ос сосса махум касыл щирыл рупитан федерация акваёт щёпитасаныл. Ты федерацият күщаиг мәнъщи хум Олег Хатанев рупиты. Ам тав ётэ хөнтхатыгласум ос касыл урыл китыгласум.

– Олег Андреевич, манасавит няврам касуңкве Сургутский районын ялыт ос хоты команда нөх-патыс?

– Солнечный павылн 72 агит ос пыгыт вөвыгласанүв. Тән Белоярский, Ханты-Мансийский, Сургутский, Нижневартовский, Нефтеюганский, Хальүс районныл ос Урай, Сургут, Нижневартовск үсытныл тув ёхталасыт. Няврамыт хұрум группа щирыл уртыгласанүв, 12-13 тәл яныт, 14-15 ос 16-17 тәл яныт агит ос пыгыт тәнки халанылт кассыт. Онтолов командат халт щар ёрыг Сургутский районт өлнэ няврамыт өлсыт, тән өвыл места висыт. Китыт мөстал Нефтеюганский районныл ёхталам агит-пыгыт майвёсыт. Ханты-Мансийский районныл өлнэ няврамыт хұрмит места виманыл магсыл янытлавёсыт. Ты касылт нөх-патум агит-пыгыт мөтыт тәл мәнъполь этпост Якутск үсн касуңкве минёгыт. Тот Первенство ос Чемпионат России тах варавет.

Ань Солнечный павылн ялум агит өвыл щёс тыньщаң рёпыгтасыт, ты элы-пәлт тән тох ат кассыт. Йильпи программа щирыл, тананылн тыньщаң пәхвтуңкве ань ос ёри. Ты элы-пәлт тән туп сәлы сун ұлтта поргысыт, ошща ййв-өвыл ёт хәйтсыт ос аква мәныл элалъ поргысыт. Мөлтты тәл пәсныл сәграпсуп пәхвтуңкве ләвсанүв, ань ос тыньщаң

рёпыгтаңкве патсыт. Тән ётаныл тренер-хөтпат акваг рупитёгыт, ханищтыяныл. Төва агит тай тох касуңкве тәра ханьщувласыт, төват мұсхалыг тыньщаң рёпыгтаңкве иң ат вөрмёгыт.

Правила щирыл касың командат 15 аги ос пыг олы. Хальүс районныл мощща няврам ёхталасыт. Та районт Саранпавылт өлнэ няврамыт тох касуңкве ханищтавет. Тән мощща олныл майвёсыт, тыммагсыл туп хөт билет ёвтсыт. Хөт няврам Солнечный павылн ёхталасыт.

Белоярский районт олныл ос лөльсаң тәстыглавет, тән ат няврам туп кётсыт. Правила щирыл мөт командат ёт тән касуңкве ат вөрмысыт. Тув щар мак ёр спортсменыт ёхталасыт, тән сәлың сун ұлтта поргуңкве, тыньщаң рёпыгтаңкве, сәграпсуп пәхвтуңкве сака хәсэгыт. Ты няврамыт халт төват сборный командан хассанүв. Тән мөтыт тәл Якутск үсн тах минёгыт. Ты агит-пыгыт ёт сәв тәл Александр Тасьманов рупиты.

– Няврамыт сосса махум холът касуңкве кәсәщёгыт?

– Ань округ янытыл 500 арыгкем няврамыт ос мәнълат хөтпат касуңкве ханищтахтёгыт. Мән тамле касыл ань вәтихал вәрыглэв. Түя порат агит-пыгыт Нижневартовский район Излучинск павылн вөвыглыянүв, таквсы Сургутский район Солнечный павылн тотыглыянүв.

Мөлтты тәл сосса махум касыл Россия реестр-нәпакн хәсвес. Ань ёмащакв каснэ няврамыт ос мәнълат хөтпат «кандидат в мастера спорта» ос «мастер спорта» яныг намыл мивет. Тамле нам агит, пыгыт ке оньщёгыт, школа астан порат ЕГЭ пәлт ат манос лов баллыл хансавет. Тамле эрнэ тәла өлнэ



О. А. Хатанев

А. Вьюткин вәрум хури

магсыл няврамыт касуңкве сака кәсәщёгыт. Ты тәл лов аги ос пыг «кандидат в мастера спорта» намыл майвёсыт. Рупитан мәнълат хөтпат ты нам өщнэныл магсыл сәвнүв олныл ойтавет. Ты тәл нёлолов хөтпа «мастер спорта» нам магсыл нәпаканыл щёпитасанүв, ань физический культура ос спорт щирыл рупитан департаментыт мисанүв. Тот тән ёмащакв ловиньтавет ос элалъ спорт щирыл рупитан Министерстван тах кётавет.

– Олег Андреевич, вәт сәграпнал этпос «Кубок России» намба касыл Ханты-Мансийск үст тах варавет. Тув Россия янытыл сәв мәнълат хөтпат ёхтёгыт?

– Ханты-Мансийск үсн мәнълат хөтпат касуңкве вөвавет. Ты касыл вәт сәграпнал этпос китыт хөталныл нёлолов хөталэ мус тыт рупитаңкве тах паты. Россия янытыл яныгсәт арыгкем спортсменыт сәвсыр мәнытныл тыг ёхтёгыт. Мән округув магсыл 11 мәнълат хөтпат касуңкве патёгыт, 6 – пыг, 5 – аги.

Людмила АЛГАДЬЕВА

Сәңквылтап таныт ханищтавет

Касың таквсы Ханты-Мансийск үст Кӧлнэ творчество Колн эрыг тотнэ махум акван-атхатыглэгыт. Тынакт тот махум округт ӧлнэ сосса мир сәңквылтап ос тарыгсыплув йив вәруңкве ос таныт сәңквылтаңкве ханищтахтасыт.

Ты элы-пал газетат потрум сәңквылтап вәрум кәркам хӧтпат урыл ӧлыс, ань ос сәңквылтап таныт ханищтама махум ӧвылтыт ловиньтән. Ты тәла палт Алексей Александрович Рещиков пуңктотыс. Тав творчество колт сәңквылтап тән ханищтан хӧтпаг ӧлы. Хум тох потыртас:

– Тамле хӧнтхатыглапыт рупата колув кӯшай тав вәруңкве лавыс. Эрыг тотнэ нэт ос хум хӧтпат тыг касың таквсы ос тӯяг ӕхталэгыт, хӯрмах хӧтал сәңквылтап ос тарыгсыплув йив таныт ханищтэгыт. Ань тынакт мәнъщи, ханты ос ӕрн махум Югорск үсныл, Советский, Нижневартовский ос Сургутский районьтныл ӧлсыт. Ты семинарыг туп сосса элумхӧлас магыс хунь вәрыглаве, мӧт хӧн мәныл ӧлнэ махум тамле урокытын ӕхтуңкве ӧс вәрмэгыт, туп

ханищтахтуңкве вос тахнувыт.

– **Тыт нотаң нәпакыгт кәсаласум, наң хансыглам нәпаканын?**

– Тамле мәнъ нәпаклӧмтыгт (рущ ширыл методичкаг лававет) эрыг ханищтан хӧтпат магыс ам хансыгласанум. Янгемәне учитель ат те ӧнъщи, ты нәпакыгт хосыт ханищтахтуңкве вәрми. Тот торгамтантәм матыр-әти хансым ӧлы – ӕрнэ нотат, сыре-сыр пӧсыт та маныр, пуссын тув шуртым ӧлэгыт. Эрыг ванэ хӧтпа такви торгамты, хумус сәңквылтаңкве эри.

Ати сака хосат ӧс акв йильпи нәпакум нәглыс – нотный сборник. Тув нотат кит ширыл хасанум, касыңе урыл янас хассум. Нотат урыл ӧс ӕмашакв хассум – хумус пӧславет, хансавет, ӕрнэ ширыл хумус ловиньтаңкве эрэгыт.

Ам сүстәмт, махум ха-



А. Рещиков ос Л. Волкова

нищтахтуңкве таңхэгыт, таимәгыс үсувн тапалыгт мәныл та ювыт. Ос таи лӧль, тӧп кит-хӯрум хӧтал рупитэв, ты сака мощща. Махманув матыр-әти ханищтаңкве ат алымэгыт. Сәттем рупитасув те, тәлав мӯсхал ширыл вәрнувлув, ученик хӧтпанув сәв тән ханищтанувыт.

Ань матъемас ищхипың ут ӧлы, махум ханищтан тәланьл кинан пӧслыяныл, ам палтум кетыяныл. Тыт ам сунсэгум, сәңквылтап тәнаныл хӧнтлыянум, тувыл ювле свонитэгу, лавэгум, ӕмас манос ӧс

мощ вос ханищтэгыт. Мән А.В. Вадичупов ӕт тох та рупитымен – тав махум ӕт сәңквылтапыгт вәри, ханищтыянэ, ам ос таныт сәңквылтап тәла палт пуңктотэгу.

– **Алексей Александрович, наңти урынт мощ потыртән, хотыл ӧлэгын, сәңквылтап таныт хӧт ханищтасын?**

– Ам Хальүс район Тәк павылт яныгмасум. Хунь хӧтыгт классыгт ханищтахтасум, павлувн сәңквылтап хум Василий Яркин ӕхталас. Таве хунтлысув, хумус таныт сәңквылтас, тувыл мән, пыгрищит, ӧс мощ ханищтахтасув.



Н. Кравчук тән сәңквылтап урыл потырты



Округ янытыл ӕхталам махум потырт хунтлэгыт

СОССА МИР КУЛЬТУРА



Людмила Петровна
саңквылтаңкве ханищтахты



Л. А. Чуваткина

Школа асламум юипалт, тыт педучилищат музыкальный отделеният ханищтахтасум. Тувыл Асугорский театрыт рүпитасум, тот акваг саңквылтасум.

Ётыл «Лылын союм» няврам ханищтан колн патхатасум, ань тыхотал мустот рүпитэгум, пыгрищит ос агирищит саңквылтапыл саңквылтаңкве ханищтыанум. Тот Владимир Савельевич Меров няврамыт маныщи ййкв ййквуңкве ос саңквылтаңкве ханищтыанэ. Мён халумент акваг нётхатымён, хунь тав хотталы мины, ам рүпитэгум, мот щёс ос тав няврамыт ханищтыанэ.

Ам аням Александр Фё-

дорович гармошккал ёнгасас, юн яныг гармошка ошсув. Ёнгуңкве такви ханищтахтас. Ньюом гармошккал ос ёнгыс. Ам ос мань порат та ут капай катын выглум, та ёнгасэгум. Савсыр эрыгсовыт амти вярсанум, тот та үнлэгум, ханищтахтэгум.

Маныщи нэ

Югорск үсныл маныщи нэ Людмила Петровна Волкова ёхталас, такви опарищ наме Вынгилева. Нэ Кимкьясуй павылт яныгмас, саңквылтап тән мань тагыл хулыглас. Людмила Петровна тох потыртас:

– Яныгмамум порат, павлувт Мань Кирилл аким саңквылтапыл саңквылтас. Ам ань үст олэгум, савсыр хонтхатыглапыт вәрыглэв – сакныл матыр-ати хартэв, аканит юнтэв, эргёв, ййквёв. Тувыл номсэгум, манрыг ат рөви саңквылтапыл саңквылтаңкве, таныт ам мань тагыл хулыгласум. Екатерина Игоревна Могуш палт ханищтахтуңкве патсум. Ты руц нэ саңквылтап таныт сака ёмашакв ваганэ, анумн матыр-ати хултыгылы.

Тыт ос А.А. Решиков палт ханищтахтэгум. Тав сака ёмас, сэрбёр хум, шар пёс махманув холыт саңквылты. Ам тыт ань саңквылтап коны-пал тарыгысплув ййвыл саңквылтаңкве ханищтахтэгум, нотный грамота ловиньтэгум. Алексей Александрович таныт ханищтан махум магыс эрнэ нэпакыт хансыс, тот матыр-ати пуссын олы. Мотыт щёс тыг яныгполь этпост ёхталэв тах.

Ам пыг оныщегум, ват талэ төвлыс. Ойкам Пермский крайныл олы. Ам ань саңквылтапыл ёнгынэм магыс тән номтанэн сака ёмасыг. Ойкамн акваг нётавем, лави: «Саңквылтап эрите, ёвтэн, ханищтахтэн».

Варьёган павыл ёрн нэ

Ты семинарн Нижневартовский район Варьёган павылныл ёрн нэ ёхталас – Любовь Александровна Чуваткина. Тыт тав хурмит щёс ханищтахтас, нэ лавыс:

– Овыл щёс ам саңквылтапыл саңквылтаңкве ханищтахтасум, тувыл тумраныл ёнгын тэла ханищтасум, ань ос тарыгысплув ййв таныт саңквылтэгум. Тумраныл ёнгуңкве ханты хумин Яков Тарлинын ханищтавесүв. Тыт сака ёмас махум рүпитэгыт, матыр-ати ёмашакв суссылтэгыт.

Ман, ёрн махум, павлувт «Шевни» нампансамбль оныщёв, янгемане ёрн эргыт эргёв, саңквылтапыл саңквылтэв. Ам тыт маныр ханищтэгум, юв ёхтэгум, ёрн няврамыт акванатыанум, пуссын тананылн суссылтэгум, потыртэгум.

Сосса махманув халт тамле каркам нёт ос хум хотпат та олэгыт. Матьёмас саңквылтап тән ханищтэгыт, пёс йис тэлат нөх-вормалтыяныл. Тащиңк маныщи тананув ма янытыл иң элалы суйтуңкве патэгыт.

Светлана
РОМБАНДЕЕВА



Ты пормасыт творчество Колг суссылтавет

КАСНЭ ВАРМАЛЬ

МАНЬТАГЫЛ КАСНЭ ХАНТЫ ПЫГ

Ювле хульгум этпост Ханты-Мансийск үсн Иван Сандрин ёхталас. Ты ханты пыг Ямал мāt Шурышкарский район Мужи пāвылт самын патыс. Тав омаге-āтыге сāлыңколт рүпитэг. Иван тунра мāt яныгмас. Сāлыт үруңкве ос пормасыт мāцтырлаңкве ёмщакв хāсы. Ань пыг такви олупсатэ урыл потыртас.

Атытэ Эдуард Романович Сандрин, сāлыңколт зоотехникыг рүпиты. Омагэ ос сāлыңколт кол-сори рүпата вари. Совхозт ат пиркāта олы. Тэн тэнки китахкем сōтыра сāлы оныцег. Экваг-ойкаг кит пыг янмалтасыг. Мāнь пыгён тэн палтэн сāлы үрим олы.

Иван яныгыг олы, тав Санкт-Петербург үст Полярный Академия нампа колт мā-вит үргалан хōтпаг хаництахтас. Ты хаництахтын кол 2015 тāl мус янас олыс, тувыл метеорологический университет ёт акван-олтвесиг. Пыг тот хаництахтаме порат Ямал мāныл олнэ мāньлат хōтпат ёт йиквим ос ёргим мā

янытыл яласас. Ты тēла щирыл тāн 2013 тāлт Сочи үсн мүйлуңкве то-тыглавёсыт. Тот щāрыщ вātат олнэ мирн лүймā олупса урыл потыртасыт ос олнэ-хүлнэ накыт суссылтасыт. Нилахуй-плов хōтал тот мүйлысыт, āлы мāt олнэ мир ты вāрмалил сака пүмщалахтасыт.

Хунь пыг хаництахтын мāныл āстыс, ювле такви олнэ пāвлэн минас. Ос мā-вит үргалан щирыл рүпата ат хōнтыс, тымāгыс метеорологыг рүпитаңкве патхатас. Ты коньпал тав пāвылт «Северная панорама» нампа газетат акв лōпсыт этпос сыс акв щёс ханты лātңыл ляххалыт хансы.

Иван яныгмам пāвлэт



Иван тыныщан рёпыгыты

каснэ тēлан мāньтагыл ялантас. Сосса мир ялпың хōталыт олывлан порат мāхум пёрщегыт, тыныщан пāхвтэгыт, сун ұлтта поргегыт, ййбөвил кит нупыл хартэгыт, акв сыс хурум щёс эл порыгмэгыт ос сāграп элал пāхвтэгыт. Тав лāvме щирыл, ты вāрмалитн сāлыңколт хаництахтас. Иң мāнь порат сāлыт сунын нэгуңкве хāсыс. Моц яныгнувег ёмтыс, матыр-āti пуссын хāсункве патыс.

Ань Иван ты тāl вāt нупыл нелолов тālэ товлыс. Тав тох лāвыс: «Сāлы үрнэ порат акваг кārкамыг олуңкве ёри. Ам тот олывланэм порат вātихал тыныщан рёпыгтэгум. Ущлахтын хōталыт сāлың колн ялантэгум. Яныгмам мāкем сака ёруптылум».

Ямал мāt лүймā каснэ школа олы, тув ханты, ёрн ос мōт мāхум нйвраманыл ялантэгыт. Сāвыңпālэ сāлы үрнэ, хүл алыщлан ос вōраян щёмьят нйвраманыл тот касэгыт. Тāн ты вāрмаль ёмщакв вāганыл, кārкамыг олэгыт.

Ань мāньлат мāхум Ханты-Мансийск үсн ёхталаманыл порат, «Тōрум Маа» музейт тāн мāгсыланыл каснэ вāрмаль щёпитālвес. Иван тот тыныщан пāхвтэс. Мансāвит щёс вуцкасāлыс, кāсың порат тыныщане пōсн патыглас. Сун ұлтта ос моц поргыс. Тав щар сāv хурумсāt щёс порыгмāлыс. Такви мātэт олывлам касылытт тōванакт тав ос нōхпатыглас.

Николай МЕРОВ



Иван котильт лүйли

Лүймā сёрипос
(Северная заря)
№21 (1207), 07.11.2019
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Врио директора –
Кондина Г.Р.
Телефон (3467) 33-22-72

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52
Е-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индекс **04399, 54399**
Тираж **1710** экз.
Заказ **4716**
Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.